

Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

तीतुस क पत्र

१ पौलुस कइती स जेका परमेस्सर क चुना भआ प्रेरित लोगन क ओनका बिसवास मँ सहायता देइ क बरे अउर हमरे धरम क सच्चाई क पूरा गियान क रहनुमाई क बरे भेजा गवा बा, इ सब, लोगन क परमेस्सर की सेवा क मार्ग बताइ। २ उ मई अइसेन एह बरे करत हूँ कि परमेस्सर क चुने हुअन क अनन्त जीवन क आस बाँधइ। परमेस्सर, जउन कभउँ झूठ नाही बोलत, अनादि काल स अनन्त जीवन क बचन दिहे अहइ। ३ उचिते समइ पइ परमेस्सर अपने सुसमाचार क संसार क जानकारी बरे परगट किहेस। उहइ संदेस हमार उद्धारकर्ता परमेस्सर क आज्ञा स मोका सउँपा गवा बा।

४ हमार समान बिसवास मँ मोर सच्चा बेटवा तीतुस कः हमरे परमपिता परमेस्सर, अउर उद्धारकर्ता मसीह ईसू कइती स अनुग्रह अउर सान्ति मिलइ।

क्रीत मँ तीतुस क काम

५ मई तोहे सबन क क्रीत मँ एह बरे छोड़ रेहउँ कि उहाँ कछू अधूरा रही गवा बा, तू ओका ठीकठाक कइ द्या अउर मोरे आदेस क अनुसार हर नगर मँ बुजुर्गन क नियुक्त करा ६ बुजुर्ग क नियुक्त तबहिं कीन्ह जाइ जब उ निर्दोस होइ। एक पत्नी बरती होइ। ओकर बचवन बिसवासी होइ अउर अनुसासनहीनता क दोस ओनपर न लगावा जाइ सकइ। अउर उ पचे निरकुस भी न होइ। ७ निरीच्छक निर्दोस अउर कउनउ खराबी स अच्छूता होइ चाही। काहेकि जेका परमेस्सर क काम सऊँपा गवा बा, ओका अडियल, चिड़चिड़ा, बहुत जियादा मदिरा पियइवाला, झगड़ालू, नीच कमाई क लोलुप न होइ चाही। ८ बल्कि ओका तउ अतिथियन क आवभगत करइवाला, नेकी क चाहइवाला, विवेक स भरा धर्मी, भगत, अउर अपने प नियन्त्रण रखइवाला होइ चाही। ९ ओका ओह बिसवास करइ जोगग संदेसा क मजबूती स धारण किहे रहइ चाही जेकर ओका सिच्छा दीन्ह गइ अहइ, ताकि उ लोगन क सदसिच्छा दइके ओन्हे प्रबोधित कइ सकइ। अउर जउन एनकर विरोधी होइ, ओनकर खण्डन कइ सकइ।

१० इ एह बरे इ बहुत जरूरी बा काहेकि उ सबइ बहुत अहइ अउर उ पचे उपदरवी होइके व्यर्थ क बात बनावत भए दुसरन क भटकावत हीं। मई विसैसरूप स गैर यहूदियन पृष्ठभूमि क लोगन क उल्लेख करत हउँ। ११ ओनकर तउ मुँह बन्द किन्ह देइ जाइ चाही। काहेकि उ पचे जउन बातन नाही सिखावइ क बाटिन, ओन्हे सिखावत भए घर बिगाड़त रहत हीं। खराब रस्तन धन कमाइ क बरे ही ओ अइसेन करत हीं। १२ एक क्रीत क नबियन त अपने लोगन क बारे मँ खुद कहे बाटइ: “क्रीत क निवासी हमेसा झूठ बोलत हीं, उ पचे जंगली पसु अहइ, उ सबइ आलसी बाटेन, पेटू अहइ।” १३ इ कथन सही बा, इही बरे ओनका बलपूर्वक डाँटा-फटकारा ताकि उ सत्य बिसवास क अनुसरण कइ सकइ। १४ यहूदियन क पुरान कथनन अउर ओन्हन लोगन क हुकुमन पइ, जउन सत्य स भटकि गवा हयेन, कउनउ धियान न द्या।

१५ पवित्तर लोगन क बरे सब कछू पवित्तर बाटइ, मुला जउन पापे स असुद्ध अहइ अउर जेनमाँ बिसवास नाही बा, ओनके बरे कछू भी पवित्तर नाही बा। वरन ओनकर मन अउर विवेक दुइनो हीं असुद्ध अहइ। १६ उ पचे परमेस्सर क जानइ क दावा करत हीं। मुला ओनकर करम दर्सावत हीं कि ओ पचे ओका जनबइ नाही करतेन। उ पचे घृणित अउर आज्ञा क उल्लंघन करइवाला अहइ। अउर कउनउ अच्छा काम करइ काम क करइ मँ उ असमर्थ अहइ।

सच्ची सिच्छा क अनुसरण

१ मुला तू हमेसा अइसेन बात बोला करा जउन सदसिच्छा क अनुकूल होइ। २ बूढ़े मनइयन क उपदेस द्या कि उ सालीन अउर अपने प नियन्त्रण रखइवाला बनइ। उ पचे गंभीर, विवेकी, पिरैम अउर सत्य सिच्छा क अनुसरण करइवाला होइ, अउर धीरज सहित सहनशील होइ।

३ इही तरह बुद्धिया सिरयन क सिखावा कि उ पचे पवित्तर जनन क जोगग अच्छा व्यवहारवाली बनइ। निन्दक न बनइ अउर बहुत जियादा मदिरा पान क लत ओनका न होइ। उ अच्छी-अच्छी बातन सिखावइवाल बनइ जेहि का उ पचे खुद पालन किए अहइ। ४ ताकि युवतियन क अपने अपने बचवन अउर पतियन स पिरैम करइ क सीख देइ सकइ। ५ जेहसे उ पचे संयमी, पवित्तर, अपने-अपने घरन क देखभाल करइवाली, दयालु,

अपने पतियन की आज्ञा मानइवाली बनइँ। जेका परमेस्सर क बचन क निन्दा न होइ।

६ इही तरह जवानन क सिखावत रहा कि उ सबइ संयमी बनइँ। ७ तू अपने आप क अच्छे कामन का उदाहरण बनावा। तोहार उपदेस सुद्ध अउर गम्भीर होइ चाही। ८ अइसेन सद्दानी क प्रयोग करा, जेकर आलोचना न कीन्ह जाइ सकइ ताकि तोहार विरोधी लज्जित होई काहेकि ओनके लगे तोहरे विरोध मँ खराब कहइ क कछू नाही होइ।

९ दासन क सिखावा कि उ सब बात मँ अपने स्वामियन क आज्ञा क पालन करइँ। ओन्हें प्रसन्न करत रहइँ। उलट कर बात न बोलइँ। १० चोरी चालाकी न करइँ। बल्कि सभन बिसवासनीयता क प्रदर्शन करइँ। ताकि हमार उद्धारकर्ता परमेस्सर क उपदेस क सब तरह स सोभा बढइ।

११ काहेकि परमेस्सर क अनुग्रह सब मनइयन क उद्धार करइ बरे परगट भवा बा। १२ एहसे हम सीख मिलत ह कि हम परमेस्सर विहीनता क न नकारी अउर संसारिक इच्छन क निसेध करत-करत अइसेन जीवन जिई। जउन विवेक स भरा नेक, भक्ति स भरपूर अउर पवित्र होइ। आज क एह संसार मँ १३ आसा क ओह धन्य दिन क परिपूर्ण करइ क बाट जोहत रही। जब हमार परम परमेस्सर अउर उद्धारकर्ता ईसू मसीह क महिमा परगट होई। १४ उ हमरे बरे अपने आपके दइ डाएस। ताकि उ सब तरह क दुस्तन स हमका बचाइ सकी अउर आपन चुने भए लोगन क रूप मँ अपने बरे हमका सुद्ध कइ ले हमका, जउन अच्छा काम करइ क लालायित अहइ।

१५ इन बातन क पूरे अधिकार क साथ कहत अउर समझावत रहा, उत्साहित करत रहा अउर विरोधियन क झिड़कत रहा। ताकि कोइ तोहार अनसुनी न कइ सकइ।

जीवन क उत्तम रीति

३ १ लोगन क याद देवावत रहा कि उ पचे राजा लोग अउर अधिकरियन क अधिन रहइँ। ओनके आज्ञा क पालन करइँ। सब तरह क उत्तम कामन क करइ क बरे तइयार रहइँ। २ कीहीउ क निन्दा न करइँ। सान्ति-पिरेम क साथ सभी लोगन स मिलकर रहइँ। अउर सज्जन बनइँ। सब लोगन क साथे नरम व्यवहार करइँ।

३ इ मई एह बरे बतावत हउँ काहेकि हम हूँ, एक समइ रहा, जब मूर्ख रहे। आज्ञा क उल्लंघन

करत रहे। भ्रम मँ पड़ा रहे। अउर सबइ वासना अउर सब तरह क सुख-भोग क दास बना रहे। हम स लोग घिना करत ही। अउर हम भी परस्पर एक दूसरन स दुस्तता अउर इसी करत रहेन। हम पचन स लोग घिना करत रहेन अउर हम पचे भी ओनसे घिना करत रहेन। ४ मुला जब हमार उद्धारकर्ता परमेस्सर क मानवता क बरे दया अउर पिरेम परगट भवा ५ उ हमार उद्धार किहेस। इ हमार निर्दोस ठहराइ जाइके बरे हमार कीहीउ काम द्वारा नाही भवा बल्कि ओकरी करुणा द्वारा भवा। उ हमार रच्छा ओह स्नान क द्वारा किहेस जेहमाँ हम फिन पइदा होइत ह अउर पवित्र आतिमा क द्वारा नवा बनावा जात अहीं। ६ उ हम प पवित्र आतिमा क हमार उद्धारकर्ता ईसू मसीह क द्वारा भरपूर उँडरे बा। ७ अब परमेस्सर हमका आपन करुणा क द्वारा निर्दोस ठहराए बा ताकि जेकर हम आसा करत रहेन ओह अनन्त जीवन क उत्तराधिकार क पाइ सकी। ८ इ कथन बिसवास करइ क जोगग बा।

अउर मई चाहत हउँ कि तू पचे इन बातन पर डटा रहा ताकि उ पचे जउन परमेस्सर मँ बिसवास करत हीं, अच्छा कामन मँ लगा रहइँ। इ बातन लोगन बरे उत्तम अउर हितकारी बाटिन।

१ बंसावली सबन्धी विवादन, व्यवस्था सम्बन्धी झगड़ा-झमेलन अउर मूर्खता भरा मतभेदन स बचा रहअ काहेकि ओनसे कउनउ लाभ नाही उ सबइ बेकार अहइँ। २ जउन आदमी फूट डालत होइ, ओसे एक या दुइ बार चेतावनी देइके अलग होइ जा। ३ काहेकि तू जानत अहा कि अइसा मनई रस्ता स भटक गवा बा अउर पापन क करत बाटइ। उ तउ खुद अपने क दोसी ठहराए बाटइ।

याद रखइ क कछू बातन

१ मई तोहरे लगे जब अरतिमास य तुखिकुस क भेजउँ तउ मोरे लगे निकुपुलिस आवइ क भरपूर जतन करा काहे कि हम उहइ सर्दी बितावइ क निश्चय कइ रखेउ ह। २ वकील जेनास अउर अपुल्लोस क ओनकी जात्रा क बरे जउन कछू आवस्यक होइ, ओकरे बरे तू भरपूर सहायता जुटाइ द्या ताकि ओन्हे कउनउ बात क कउनो कमी न रहइ। ३ हमरे लोगन क सतकर्मन मँ लगा रहब सीखइ चाही। ओहमाँ स भी जेनका बहुत जियाद जरूरत होइ, ओका पूरा करब ताकि उ पचे विफल न होइँ।

१५ जउन मोरे साथे अहइ, ओ सब क तोहे नमस्कार। हमरे बिसवास क कारण जउन लोग हमसे पियेम करत हीं, ओन्हेऊ नमस्कार।

परमेस्सर क अनुग्रह तू सबके साथे रहइ।